

Ilaqutariit nukittorsarumallugit ilaqutariinnik siunnersuisartut (coaching) pillugu apeqquteqaat allaavigalugu oqallinnissamik siunnersuut
(Inatsisartuni ilaasortaq Nivi Olsen, Demokraatit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Naalackersuisut apeqquteqaat allaavigalugu oqallittoqarnissaanut siunnersuummut saqqummiunneqartumut qujapput. Ilaqutariit ataatsimoorfiusutut qaninnerpaajummata nukittunerpaajummatalu siunnersuuteqartumit oqaatigineqarmat Naalackersuisut isumaqatigisorujussuaat.

Uagut naalackersuinnermik suliaqartuusugut ilaqutariinnut pitsaanerpaamik tunngavissiinnissatsinni ilungersuuteqarnissarput, ilaqutariinnullu atugarliortunut pisariaqartitsisunullu tapersersuinissarput pingaaruteqarpoq. Ilaqutariimmi toqqissisimasut ingerlalluartullu taamaalillutik meerartatsinnut tunngavissiilluarnermikkut meeqqat peqqilluarlutik nukittullutillu peroriartornissaannut qulakkeerinnittuupput.

Ilaqutariittut inuunerup pingaaruteqassusaanik Naalackersuisut ilisimaarinnipput. Taamaammata Naalackersuisut ilaqutariinnut politikeqarnissamik sulissuteqarput. Taamatut politikeqarnermi ilaatigut suliniutit tamarmik meeqqanut inuusuttunullu tunngassuteqartut ilaqutariinni allaaveqartinnissaat qulakkeerneqassaaq. Ilaqutariinnut ataatsimoorfiusumik politikeqarneq aamma naalackersuinikkut suliaassarfiit assigiinngitsut akornanni suliniutit ataatsimoorfiunissaannik qulakkeerinniffiusussaavoq. Ilaqutariittut inuunermi assersuutigalugu makku aamma pineqarput: inissaqarneq, ilinniagaqarneq, suliffeqarfeqarfik peqqissuunerlu.

Ilaqutariit allaavigalugit sulineq aallartereernikuuvoq. Assersuutigalugu Isumaginninnermut Aqutsisoqarfik ilaatigut periaatsip matuma siammarternissaanik piviusunngortinnissaanillu suliaqarpoq: Ilaqutariinnik siunnersuisarneq. Ilaqutariinnik siunnersuisarneq periaasiuvoq inunnik isumaginninnikkut sulinnermi atorneqartoq, ilaqutariillu tamarmiusut sullinniarnearput. Tassanilu inissiisarnerit ikilisarnissaat anguniagaavoq. Periaaseq oqaloqateqartarnermik allaaveqartoq, inunnillu meeqqap nukinnik aallerfigisaanik ukkatarinnittoq. Taamaalillunilu ilaqutariit attaveqaatitik peqatigalugit meeqqap qanoq ililluni ikiorneqarsinnaaneranut pilersaarusiortussaapput.

Meeqqanut, inuusuttunut ilaqutariinnullu suliaassarfinni ilaqutariinnut sammititsinnermik ukkatarinninnerup saniatigut pitsaaliuinnermut suliniutit aamma pitsaanerulersissavagut. Isumaginninnermi suliaassarfimmi pitsaaliuinnermut siusissukkullu iliuseqartarnerit annertuumik sammineqareerput. Assersuutigalugulu Isumaginninnermut, Ilinniartitaanermit aamma Peqqissutsimut Aqutsisoqarfiit akornanni suliaassarfiit assigiinngitsunik suliallit akornanni suleqatigiinneq ingerlanneqarpoq. Suliaassarfiit pingasuusut taakku suleqatigiinneranni makku ukkatarineqarput; Meeqqat tamarmik atugarissarluutik ineriartorluarlutillu inuuneqalissasut kiisalu kinguaariinni tullinnguuttuni inissiisarnerit suliat, kinguaassiuutitigut atorerluinerit, persuttaasarnerit atorerluinerillu ikilisarnissaat ukkatarineqassasoq.

Peqqinnissaqarfimmi pikkorissartitsisarneq MANU pigineqareerpoq. Pikkorissartitsinermi ilaqutariit tamarmik qitornartaartussat saaffigineqarput. Angajoqqaanut pikkorissartitsisarneq inersimasunut perorsaaniikkut neqeroorutaavoq, tassanilu angajoqqaat ukkatarineqarput. Nutaanik ilisimasaqalersarput, misilittakkaminnik avitseqatigiissinnaapput, namminnerlu meerartik ilanngullugu pitsaasumik patajaatsumillu inuuneqalernissaminnut tapersorneqarlutik. Angajoqqaat angajoqqaatut pisussaaffimmini nukittunerulernissaat siunertarineqarpoq, meeqqat taamaalillutik toqqissillutik peroriartorsinnaaqqullugit.

Naalackersuisut kinguaassiuutitigut atonerluineq akiorniarlugu ataatsimut periusissiaat - "Killiliisa" - pitsaaliuinnermik ukkataqarnermik aamma imaqarpoq. Isumaginninnermi suliassaqarfimmi suliniutit aallartereersut arlallit sullinniakkanut amerlasuunut sammititaapput, taakkunanilu ilaqutariit imatut atugarliortuunngitsut aamma ukkatarineqarput. Kommunini ilaqutariinnut sullissiviit arlallit ammasumik siunnersuisarnerat aamma taassallugu pingaartuusoraara. Ilaqutariillu taamaalillutik innersuunneqanngikkaluarlutik siunnersorneqarlutillu ilitersuiffigineqarsinnaapput.

Isumaginninnermi suliassaqarfimmi suliniutit pineqartillugit isumaginninnermi pingaarnertut inuiaqatigiinni inuit atugarliortut sullinneqarnerusarnerat pineqarmat erseqqissassallugu pingaaruteqarpoq. Isumaginninnermullu Aqutsisoqarfimmi sulinnermi meeqqanik inuusuttunillu taakkualu ilaquataannik tapersersuinissaq amerlanertigut aallaaviusarpoq - nalinginnaasumillu innuttaasunik sullissisarneq annikinneruvoq.

Nunatsinni ilaqutariinnut tamanut pitsaasumik tunngavissinissaq qulakkiissallugu ukkatarisariaqarparput. Taamaaliorpugut ilaatigut meeqqanut, inuusuttunut ilaqutariinnullu suliassaqarfimmi siusissukkut suliniutit pilersinnerisigut nukittorsarnerisigullu. Nukissat isumaginninnermi suliassaqarfimmi pigisavut - sulisoqarniarnikkut aningaasaqarniarnikkullu nukissat eqqarsaatigalugit - ilaqutariinnut inunnullu pisariaqartitsinerpaanut atugarliortunullu tapersersuinissamut siullertut atorneqassapput.

Pitsaaliuinnermik suliqaarnerup ilaatut ilaqutariinnik ilitersuisarnerup ingerlanneqartarnissaa pillugu isumassarsiaq soqutiginarpoq, ilaatigut siunnersuutip sumiiffinni isumalluutit aallaaviussasut ukkatarimmagit.

Taamaattorli Naalackersuisut isumaqarput inunnik isumaginninnermi suliassaqarfimmi aningaasaliissutit sumiiffinni inuit ilaqutariinnik sullissereersut akornanni piginnaasaasa nukittorsaaffiginerinut atorluarnerusinnaagigut. Taamatuttaaq siusissukkut pitsaaliuinnermilu suliniutit pingaartillugit suli ukkatarissavagut. Aamma kommunini, peqqinnissaqarfimmi, ulluunerani paaqqinnittarfinni, meeqqat atuarfiini allanilu sulisut unammilligassaasinnaasunik imaluunniit inuunerlunnernik pasitsaasaqarunik takunninnerminnut iliuuseqarnissaminnullu pisariaqartitanik ilisimasaqarnissaat eqqortunillu sakkusaqarnissaat qulakkeertariaqarparput.

Taamatut oqaaseqarlutik pissarsiffiusussamik pitsaasumillu oqallittoqarnissaanut Naalackersuit qilanaarput.